



*Jonas est derechef enuoyé aux Niniuites, pour leur annoncer l'ire de Dieu.*



VAND Jonas fut hors du ventre du poisson, la parole du Seigneur luy fut faite pour la seconde fois, disant ; Leue-toy, & t'en va à Niniue la grande Cité, presche en icelle la Predication que ie t'ay dite. Lors Jonas se leua, & s'en alla en Niniue, selon la parole & le commandement du Seigneur : Et Niniue estoit vne grande Ville, de trois iours de chemin. Adonc Jonas commença à entrer en la Cité, & y chemina vn iour ; puis cria & dit ; Il y a encore quarante iours à passer, & Niniue sera renuersée, & ruinée : ainsi il annonça aux habitans de la ville de Niniue, que le Seigneur estoit irrité iustement contre eux, pour les offenses qu'ils auoient commises ; & les exorta de faire penitence, & d'implorer la misericorde de Dieu. La Predication de Jonas fut receüe en bonne part des habitans de Niniue, & creurent à la parole du Seigneur, & ils publierent le ieusne, & se vestirent de sacs, depuis le plus grand iusques au plus petit, se repentirent cordialement de leurs pechez & offenses ; & sans fiction firent penitence pour appaiser l'ire & le courroux de Dieu, qui estoit irrité grandement contr'eux.